



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Syria menoknok lendong ajurua
alirtem memonui yaritsüla: Qatar Emir

Kylian Mbappe-i PSG nung
otsü tasen ka yanglyuogo



VOL. XX NO. 143 (ADOK 143) DIMAPUR TENTONÜ (MONDAY)

METSÜREMI (MARCH) 06, 2023

₹ 5.00

Wokha nung yimtsüing 6 timtemer



Kohima, March 5, 2023 (TYO): Nagaland election tembangba sülen 38-Wokha Assembly Constituency kübok nisung kari yimtsüing troki aoba electricity connections raksatsüba ajanga yimdaklirtemi timtemer.

Yimtsüing 6 ji Pongitong, Tsungza, Khumtsu, Meriyan, Totsu aser L. Yanthung lir, ta Deobarnü NCP media cell-i metetdaksü.

Longsa nung BJP candidate Renponthung Ezung pusemertemi iba mapa ya inyak ta NCP-isa tai tongloksüogo.

Taküm election nung NCP candidate Y. Mhombemo Humtsoe-i votes 3,061 agi Ezung madak takok ngua liasü.

Item yimtsüing 6 nungi votes ajak agi 1,973 lir.

March 2, 2023 nü NLA result adokba anogo nungi yimtsüing 6 indang power supply shibang aser tanü electric posts ajak

raksatsü, ta 38-Wokha A/C nung NCP media cell-i sangdong ka nung ashi.

"Yimtsüing 6-i Longsa nungi BJP candidate nem votes 100% meinoktsüba atema tejashi nung power supply raksatsüba lir. Ajisüaka, BJP candidate pusemertemi yimtsüing 6 nung alirtem amokmerenba, merenshiba aser teka sangshiba ajanga BJP candidate nem ang votes teimba enokja liasü" ta Media Cell-isa ashi.

Longsa nungi BJP candidate pusemertemi iba tesempatsü mapa inyakogo anungji alima nung yimjung meimer ajaki aitsütsüla. NCP candidate-i votes 3,061 agi takok angu anungji yimtsüing 6 nung votes ajak enokjaka 1,973 dang lir, anungji parnoki ajaki enoktsü nunga NCP candidate-i votes 1,088 agi ayongayonga takok ngur lila, ta NCP-isa metetdaksü.

Kohima Police-i traffic & "No Drone Zone" metetdaksür

Dimapur, March 5, 2023 (TYO): March 7, 2023 nü Capital Cultural Hall, Kohima nung 14 buba Nagaland Legislative Assembly tezüngzüktep agiba sentong atema Kohima Police-i traffic tetuyuba agütsüogo.

Iba anogo TCP Gate adena Classic Island nungi Phoolbari aser Ao Church adena Phoolbari nungi 1st Assam Rifles Main Gate tashi "NO PARKING ZONES" alitsü ta Kohima Police-i metetdaksüogo.

Iba mapang gari lenmang nung gari anena aliba ajak atsür aotsü aser iba senji gari kiburi menoktsü ta parnokisa ashi.

PHQ Junction len nungi aluba gari ajak Classic Island adena Lady Miles Road-i yoktsü. High School junction/Bayavu nungi atuba gari ajak Census Point adena

KOHIMAS Hospital-Naga Bazar Road-NHAK Junction-i yoktsü ta police-isa ashi.

Maneni, North PS junction nungi Razhü Point-i aoba garitem New Market-Naga Bazar Road leni yoktsü. Anungji nübortemi iba traffic tetuyuba sülen anidaksü mepishir, ta PRO, Kohima Police-i sangdong ka nung ashi.

Ano, March 7, 2023 nü Kohima Municipal kübok Kohima district ajunga security dak ajemdaker "No Drone Zone" asütsü metetdaksür ta Kohima Police-isa ashi.

Iba anogo drones, unmanned aerial vehicles (UAVs) amala remotely piloted aircraft (RPA) kecha mamshitsü aser tashi mangartem indang UIN/ UAOP meyipa agütsü, ta parnokisa metetdaksü.

March 7 nü Kohima jila nung school ajak sodi agütsür

Kohima, March 5, 2023 (TYO): Directorate of School Education (DoSE) Nagaland-i March 7, 2023 nü Kohima nung aliba school ajak sodi agütsür.

"March 7, 2023 Nagaland Chief Minister aser Council of Ministers tezüngzüktep agiba sentong nung Prime Minister-i anir tongtipang nisungtem arutsü aliba ajanga iba anogo Kohima nung aliba school ajak sodi agütsür" ta School Education indang Principal

Director, Thavaseelan K-i metetdaksü.

"Iba ya Kohima nung security maparen akangshiba nung ajemdaker lemtetba lir. Ajisüaka, tatidang agütsüba school tembo akhi ama lapoktsü" ta pai sangdong ka nung ashi.

Maneni, Kohima tezülen aliba school tembo sodi magütsür aser school ketdangsurtemi kaketshirtem dang Traffic Advisory jungunga metetdaksütsüla, ta Thavaseelan-isa ashi.

Amit Shah'er kidang NE state 3 nung sorkar akümtsü senden amen

New Delhi, March 5, 2023 (Agencies): Northeast state asem-Meghalaya, Nagaland aser Tripura nung sorkar akümtsü atema Deobarnü BJP-i kanga dang tongtipang senden ka menogo.

Northeast state asem rongnung tasüngdangba tulubaji Tripura lir. Iba state nung shibai Chief Minister inyaktsü mejangjar. Osang kar ajanga Manik Saha-i CM inyaktsü ta ashir saka Tripura state BJP shilem katibo union minister Pratima Bhowmik nem ang inyakdaksünür.

Tanü Union Home Minister Amit Shah'er kidang senden amen aser idangji BJP president JP Nadda, Assam Chief Minister Himanta Biswa Sarma aser Nagaland Chief Minister Neiphiu Rio nung aden.

Rio-i aniba NDPP-i menden 25 nung takok angu aser paisa Chief Minister inyaktsü. Meghalaya nunga Conrad Sangma-i aniba NPP-i anir sorkar akümtsü aser Conrad-i maneni chief minister inyaktsü.

Ajisüaka, kanga dang tongtipang onük kaji Meghalaya aser Nagaland nung BJP nem cabinet menden kwi lenzüksütsü ta asüba lir.

Meghalaya nung BJP MLA 2 nungi ka nem cabinet menden agütsütsü ta osang angazüker saka Nagaland asoshi telemtetba magi lir.

Tripura nung Manik Saha-i Hokolbarnü Chief Minister menden yutsüba shidi agütsüogo.

Nagaland nung Deputy CM atema senden amen

New Delhi, March 5, 2023 (Agencies): New Delhi nung NEDA convener aser Assam CM Dr. Himanta Biswa Sarma-i Union Home Minister Amit Shah den Nagaland sorkar akümtsü atema senden ka amen.

Iba senden nung Nagaland caretaker Chief Minister Neiphiu Rio aden, ta osang ajanga ashi.

Iba senden ya Nagaland nung taruba Deputy CM den cabinet

Tripura nung BJP-i sorkar akümtsüsa kümra Saha-i maneni CM inyaktsü ta BJP-i shia liasü saka 2018 den medemdangra BJP-i taküm menden tajemba nung takok anguba ajanga Chief Minister nübo atema tasüngdangba ka adoker.

Saha anema noktaktertemi Bhowmik nem mezüngbuba tetsür Chief Minister inyakdakang ta takhangba agütsür.

Election agütsü küm ka shi lia Saha jakdang inyakba CM Biplab Deb mapa nungi anentsü. Deb-i mebilemdangi inyakshangshiba aser law & order tiptema meyutetba ajanga BJP tenüing menütsür ta BJP nem shisalen sayur Rashtriya Swayamsevak Sangh (RSS)-i ashiba sülen pa Chief Minister nungi agiena liasü.

BJP-i Deb melena Saha shim aser pai kanga dang anükanüka Tripura len anir aruogo.

Honibarnü BJP-i Tripura nung chuba jabaso aser Tipra Motha chairman Pradyot Kishore Debarma den olemteptsü renema lir ta shiogo.

Taküm Assembly election nung BJP sülen Tipra Motha-i menden teimba nung takok nguteta liasü. Tipra Motha-i 'Greater Tipraland' takhangba agütsüba BJP-i magizüker aser iba ajanga telok ana tesentaktep mejungi dang arur.

"Tipra Motha ajanga lisopurtem renloktsü indang onük kar lemsatepogo. Tripura state melemsai onoki parnok den jembitsü aser lisopurtem khuret

koktettsü renema lir. Saka onoki Greater Tipraland indang mejembitsü aser Tripura longjema dang alitsü" ta Himanta Sarma-i Honibarnü ashi.

Meghalaya nunga National People's Party-i single largest party takok anguba sülen president Conrad Sangma-i sorkar akümtsü kuli agütsüogo aser pai March 7 nü Chief Minister inyaktsü tezüngzüktep agütsü.

Meghalaya assembly election magidang NPP-i BJP den tesentaktep pilaa liasü.

Züngsem 60 agi akümba assembly nung NPP MLA 32 lir aser ibaji 'absolute majority' ta Conrad-i ashir.

BJP central leadership-i Conrad Sangma'er sorkar ya linük nung ochimashitiba sorkar rongnung ka ta shiogo anungji election temer parnok longjembaji temenünütsüka lir, ta Congress-i metetdaksüogo.

Nagaland nung mapang talangtiba chief minister inyakshang Neiphiu Rio-i kümsük pungububa atonga CM inyaktsü.

Nagaland nung NDPP-BJP tsüingda 2018 assembly election nung ama menden 40:20 lemsar toktepa liasü. Sorkar tasenba nung Rio-i maneni CM inyaktsü ta NDPP o BJP tsüingda tangatettep liasü.

Northeast state asem nung taruba hopta chief minister aser tanga minister temi tezüngzüktep agiba sentongtem agütsü aser sentong ajak nung Prime Minister Narendra Modi adentsü.

Meghalaya nung NPP teloktep nung MLA 45 kümogo

Shillong, March 5, 2023 (Agencies): Meghalaya nung National People's Party (NPP)-i aniba teloktep tashi itshioago aser ibaji United Democratic Party (UDP) o People's Democratic Front (PDF) ajanga parnok pusema nungitba ajanga lir.

Chief Minister Conrad Sangma-i aniba NPP teloktep nung Bharatiya Janata Party (BJP)

asir Hill State People's Democratic Party (HSPDP)-i yariteper. Iba nung UDP aser PDF ajanga yariba ajanga züngsem 60 agi akümba Meghalaya Legislative Assembly nung NPP teloktep ket nung nübo 45 kümogo.

Meghalaya nung yimtenren tensa süngjemtsü aser terenlok atema UDP-i NPP yarir ta metetdaksüogo.

Külen, PDF-i taoba mapang Congress pusema liasü saka parnokia NPP yaritsü ta metetdaksüogo.

"UDP aser PDF-i ozü sorkar nungitba pelashishia agizüker. Iba ya Meghalaya tensa süngjemtsü aser renloktsü atema kanga tongtipang lir" ta NPP president aser Meghalaya Chief Minister Conrad Sangma-i ashi.



Guwahati: Meyi arutsü anasa Assam sorakari state tesem ajungalen ayong, awatsüng aser tzu ayimba tesemtem nung nisung aliba azüngtetdaksütsü akok. Guwahati nung aliba Silsako Beel wetland nungi nisung jenti azüngtetdaksüba sülen iba mera ya agitsü, ta osang ajanga ashir. Wetlands aser ayongtem nung nisung arua aliba ajanga Assam kübok tesem aika nung tzumetsüng adoker.

Nagaland Voluntary Consumers' Organisation-i state sorkar ayongzüker

Dimapur, Metsüremi/March 05 (TYO): Nagaland Voluntary Consumers' Organisation ajanga union/organisation/association tem dang fund drive aser donation meshiba mapa meinyaktsü aser state sorkar, talisa sorkar tasenba dang maneni taoba mapang lemtetba ama VIP yimya mamshitsü, terenlok mapa (development project) nungi percentage/commission magitsü, backdoor appointment magitsü, Chief Minister Office den sendaktepa ex-cadre meshimtsü, cabinet aser minister of state jenjang nung legislator masürtem advisor ama meshimtsü, highway nung taxes meshiba meshi-meshia anendaktsür aliba indang mejembitsü, Khristanpurtem reshikangshiba aser merenshiba nungi kumzüksü ajungshir, ta sangdong ka ajanga ashi.

Yimya balala nung senotsü bendenba aser donation meshiba asoshi Dimapur Naga Students' Union (DNSU) ajanga ola adokba pela agizüker aser shishilembar dang fund drive aser donation meshiba kisüng nung metaloka malitsü atema kaketshir tentet temi "work and earn" yimyim ayimtsüla, ta ashi.

Chiyongtsü, calendar, lottery & buffet ticket tem ayokba amala fund raise mapa state sorkari nokdangtsüla, kechiaser item ya yimjak nung ayuaba den sako lir, koba ajanga osettsüset nung jenjang tali temlokdaaktsür, ta NVCO ajanga ashi.

Nationalist Democratic Progressive Party (NNDP) den Bharatiya Janata Party (BJP) ajanga March 7 nü sorkar tasen

tentetsü ama aliba pela agizüker aser ano taoba mapang cabinet nung lemteta aliba ama Nagaland nung VIP yimya mamshitsü ajungshir, ta ashi.

Lenmang, apu aser ki o jen amala terenlok mapa tem mapang shidak nung junga renemtsü asoshi sorkar tasenba aser talisa politician/advisor/minister aser dangartemi terenlok mapa atema sen aruba nungi Party-Fund tenüng nung percentage/commission magitsü NVCO-i ajungshir.

Ano state budget/exchequer nungi menüngdakba nung sen magizüksü mechi NVCO ajanga CMO den sendaktepa alitsü asoshi taoba mapang ex-cadre amenoka non-government employees shima commissioner & secretary, secretary, joint secretary, deputy secretary jenjang nung ita shia itasen agütsüba anentsü ayongzüker.

Ajidang masü cabinet aser minister of state jenjang nung legislator masürtem advisor meshimtsüla, ta ashi.

Inter-state gate tem dak alaka police check gates, pay-counters amala highway nungi agiener/nokdanger/shibanger aliba tanaben amenoktsü asoshi khenyongi meblemtsüla, ta ashi.

Tawa agiba 14th Nagaland Legislative Assembly election nung sen tashi agi takok anguba ajitetogo aser takok angur-mangur candidate ajaki vote alitsü asoshi sen jenti indokba aser ano kari sen jenti meshiba angashiogo, anungji ochimashi mapa tali inyaktsü amai ajiteteter, anungji watch dogs organisations/associations/RTI activists tem tali saksalemtsü

ayongzüker, ta NVCO-i ashi.

Ano minister mesüra advisor temi P.S (personal secretary) kwi nungdaker aji meteta alitsüla, kechiaser PS karbo pei kibur (minister/advisor/MLA) dang takaitba akumer, ta ashi.

Asenoki Nagaland nung Lokayukta tashi itdaksütsüla aser yangji ochimashi & political party den sendaktepa alirtem züngsem ama meshimtsüla.

Asen linük nung Khristanpur reshikangshia amshiba aser merenshiba tatalokbatem jetti lir aser Nagaland densema state kata item kabu nung kumzüka mali, kong tekülem ki maneni raksatsür/rongdoktsür, mainland nung missionary/pastor/arogo tenzükerterem arem nung atsükshia alir, Assam nung RSS den affiliate süa aliba JDSSM (Janajati Dharma-Sanskriti Suraksha Manch) ajanga ST list nungi Khristanpur agientsü ahangba asenoki angur. Anungji March 7 nü Capital Cultural centre, Kohima nung tenangzüktep agiba sentong nung Ato Kilonser Narendra Modi aser ano BJP lenir aika arua adentsü amai angazüker asünung, Freedom of Religion Act memsüra anti-conversion law tem pei state den abet amshitsü ajungshir, ta ashi.

Indian Penal Code kübok tashiyim amshia tamangba yimsü melendaktsüba ya aibelen tulu ama tatep temerenshi agütsütsü mela lir. Nagaland ya Khristan state ka asünung Naga nungertemi Khrista dak amanga alitsü, ta NVCO ajangasa ashi.



March 3 nü Assam Rifles Mokokchung Battalion-i Mokokchung District kübok Watiyim yimtsüng nung Govt Primary School nem IT equipment tem tenla agüja liasü. Lt.col. Dhruv-i anir AR-i school nem computer 3, table 3, chair 3 aser printer ka agüja liasü. Assam Rifles-i kaketshirtem ajangzükdaktsütsü atema iba tenla tajung agütsüba atema GPS, SMC aser Village council Watiyim-i kanga pelaba sangdong ka ajanga metetdaksüogo.

Phom nunger aser Naga nunger dang kanga pelar: S. Pangnyu Phom

Dimapur, Metsüremi/March 05 (TYO): 50 Longleng Assembly Constituency nungi BJP candidate S. Pangnyu Phom ajanga sangdong ka nung, Auching nungi Ladigarh tashinung aliba Phom nunger dang pelaba lemsatepa liasü.

Nagaland Legislative Assembly asoshi pezüben buba toktepa nung tanü ni tamakok ajuru saka inyakyim ajak nung nükjidong tuluba yur yangji takok ngua asen nüburtem temaba jenjangi ajungkettsü asoshi ni yimjung aser tesunep nung inyaka aru, ta ashi.

14th Nagaland Legislative Assembly atema tawa agiba General Election nung ni yarirtem dang kanga pelar aser tushia bilemer.

Nenok senti vote aser tanen makai nübu, rongsen aser sarasadem agi yariba kü molungjang taroktiba nung teti alitsü aser nenok ajak kanga pelar, ta taoba minister Pangnyu-i ashi.

Kü nüburtem asoshi

inyaktsü ni temolungtetba tulu nung lir aser ozü tebou tajung district Longleng, Eastern Nagaland aser talisa Naga nunger ajungtsü asoshi mezüng südaktsür inyaktsü ni nangzüker, ta ashi.

Nübuyimba mapang temoatsü agütsüba aser kumzüka ayuba atema ni Tulusang Tsüngrem nem tenüngsang agütsür aser sempet aser nükla tajung aketba lenir Ato Kilonser Narendra Modi, Home Minister Amit Shah, BJP National President J P Nadda aser BJP nung tenzüker temi yaritepba aser lenmang balala sayua len aniba atema pelaba lemsateper, ta S. Pangnyu Phom-i ashi.

A. Pongshi Phom aser Bangtick Phom aser takok anguba candidate ajak dangi tepela salem abener. Nenoki tarutsü anogotem nung tajungtiba inyaktsü sarasadema atar. Tsüngremi nenok ajak moajang, ta Phom-isa ashi.

NSCN/GPRN-i Tsukhenye benjong salem abener

Dimapur, Metsüremi/March 05 (TYO): Chakhesang Naga nunger dangi Tsukhenye benjong salem abener, koba anogo pezü tashi amunger, ta NSCN/GPRN (Akato Chopi) indang MIP (Ministry of Information & Publicity) sangdong ka ajanga ashi.

Tsukhenye benjong

mezüng anepdang yimtsüng nung taintemi an tepong ka tenla agütsür aser teburtemi anepdang züngia lia tzu agia temang mürekteter.

Chakhesang nunger adianu aser adianutsür temi maneni lenla ajak nung takoker süa yimjung tesunep bener arutsü NSCN tamang teimla lir, ta sangdong ajangasa ashi.



Manipur nung Kom kin indang ananü Berkap-Reiju benjongmung Manipur Chief Minister N. Biren Singh-i lapoktsüdang tangokba noksa nung angur. Iba benjong ya Honibarnü Kangpokpi district kübok Ichum Keirap Kom yimtsüng nung tenzüker, koba Kom kin sobaliba temaba jenjangi ajungkettsü asoshi amunger.

NSCN/GPRN ajanga asükhu lemsateper

Dimapur, Metsüremi/March 05 (TYO): Zion Hospital Dimapur nung March 5, 2023 nü Kilonser aser Sunito village tekolakba Hetovi Yeptho ajungbena aser tia makai asüba atema asükhu aser mangyim tejashi lemsateper, ta NSCN/GPRN (Akato Chopi) indang MIP (Ministry of Information & Publicity) sangdong ka ajanga ashi.

Asür Hetovi Yeptho ya ola tanük saka linük tenzüksü tejangraba tulu keta aliba aser ochishir lenir ka liasü, shibai molungsoa linük tenzükdang jenjang balala nung tenzüka

aruogo. NSCN/GPRN asoshi nendaka inyakba linük tenzüker, tejak tesangwa aser nisung tajung ka samaogo, koba ajanga nembangtsü makokba tawa tuluka adokdaaktsür, ta sangdong ajanga ashi.

Asür Hetovi ya tetemjen lenir ka aser linük meimer ka liasü.

Asür tanüla teti tatem maka tesunep nung anisungzükjang ta sarasademtsür aser Tajung Tsüngrem dang par kinunger nem tesunep aser anisungzk agüjang ta sarasademtsür, ta NSCN/GPRN sangdong ajangasa ashi.



New Delhi, March 05, 2023: Amongnü New Delhi nung Chief Justice of Delhi High Court, Justice Satish Chandra leniba nung High Court of Delhi judge temi Amrit Udyan, Rashtrapati Bhavan semdangba mapang nung linük Tir, Droupadi Murmu-i parnok den tangokba noksa nung angur.

Angh menden tim mesüi amshir ta party 8-i PM nem metetdaksü

Hyderabad, March 05 (Agencies): Amongnü yimtenren party 8 nungi lenir 9-i shidi ka ajanga Ato kilonser, Narendra Modi dang, Centre nung BJP sorkari Angh menden aser Central agencies tim mesüi amshia opposition party tem aser lenirtem anema inyaker, aser ibaji ajanga linük ya democracy aliba nungi autocracy kümogo, ta metetdaksü.

Opposition lenirtem anema ken o benokba mesüra apubaji election mapang den külemi dang denjiteper, aser ibaji ajanga itemji yimtenren tsütsü nungi inyakba lir ta jangjar, ta parnok i ashi.

Iba shidi nungji sign süa alir opposition lenirtem rongnung Telangana chief minister K Chandrasekhar Rao, JKNC tongti Farooq Abdullah, TMC tongti Mamata Banerjee, NCP tongti Sharad Pawar, Delhi CM Arvind Kejriwal, Punjab CM Bhagwant Mann, RJD lenir Tejashwi Yadav aser SP tongti, Akhilesh Yadav nunger lir.

Tawa AAP lenir, Manish Sisodia apuba dak sendakba nung opposition lenirtem jagi, pa anema tai tonglokja aliba nungji tamendakdak mali, ajisüaka yimtenren tsütsülen nungi asalentong yanglua apuba lir, ta metetdaksü.

"Pa apuba ajanga linük nüburttem jashidaksüogo. Delhi

nung school education jenjang ajungketba atema alimai pa meteta lir. Pa apuba ya ajanga alima tesem ajaklen yimtenren tsütsü tanemer anema inyakba tatishitsü amshitsü aser democratic inyakyim majungba sayutsü," ta parnok i shidi nungji shia lir.

Parnokisa, oppositon party tem nungi lenirtemi BJP nung adenba sülenbo sorkari parnok anema bushisüngdangba ajema akümer, ta ashi.

Assam Chief Minister, Himanta Biswa Sarma tetshia, Sarada chit fund ken o nung Central agency temi pa anema bushisüngdanga liasü saka 2015 küm pai Congress toktsür BJP nung adenba sülenbo pa anema bushisüngdang masür, ta parnok i metetdaksü.

"2014 küm nungi tenzüka central agency temi ken o benokba, apuba, mita aoba mesüra asüngdangyaba yimtenren lenirtemji teimbaka opposition nungi lir. Ajisüaka BJP nung adenba sülenbo taoba mapang opposition lenirtem anema bushisüngdangba mezülongi akümer," ta parnok i kasa shidi ajanga metetdaksü.

"Narada sting operation ken o nung ED aser CBI-i taoba mapang TMC lenirtem- Mukul Roy aser Suvendu Adhikari na anema bushisüngdanga liasü, saka state nung assembly

Uttarakhand state kübok Uttarkashi jila nung menoknok anak

Uttarkashi, Metsüremi/ March 05 (Agencies): Amongnü anepdang züngia Uttarakhand kübok Uttarkashi jila nung alirtem aika mejanga lia menoknok anakba ajanga aoksar saaka kimai jena alu, ta ketdangsertemi metetdaksü.

Anepdang züngia 2.5-magnitude nung menoknok anakba sülen ano anaben tashi menoknok anak, ta District disaster management nungi ketdangser kati metetdaksü.

Ibe lendong nung nisung asüba, yiruba mesüra kiojen raksaba osangbo mali. Menoknok anakba sülen nisung aika kidangi metui moapu nung dang sangwadaksü.

election agitsü lia tenati BJP nung adenba sülenbo tena anema bushisüngdang masür. Item ama tatishitsü aika lir," ta parnok i metetdaksü.

"Ano state aika nung Angh temi linük temzüng alema inyaker aser mapang shia state sorkar yimsüsüba nung tetsükdaksü agütsür. Parnoki metetsümonga nüburttemi democratic inyakyim nung shimba state sorkartem anema inyaker aser parnok melung süa yimsüsübaren nung tetsükdaksü agütsür," ta shidi nung shia lir.

Telangana Angh süaka Tamil Nadu, Maharashtra, Punjab, West Bengal mesüra Delhi nung Lt Governor süaka Angh temi Centre aser state tsüngda ongdang tuluba kümdaksür; ibayongji linük nüburttemi India nunger democracy nung Angh ka teinyaktsü shilem tsütsü tasüngdangba aka tenzüko," ta kasa shidi ajanga metetdaksü.

Delhi LG-i tesayurtem training atema Finland-i yoktsü lemtetogo

New Delhi, March 05 (Agencies): Delhi Lieutenant Governor, VK Saxena-i menor ang tesayurtem Finland Teacher Training program nung adentsü atema yoktsü lemtetba ya linük temzüng aser Supreme Court ashioktsüba lir, ta Delhi nung AAP sorkari aitsü.

Delhi Chief Minister, Arvind Kejriwal-i aniba sorkari sangdong ka ajanga, "L-G-i Finland Teacher Training program atema file ita pezü soita ayuba sülen agizükogo, aser iba ya nungdak maka kümogo, kechiyong training ji December 2022 aser March 2023 nung agitsü liasü," ta metetdaksü.

Delhi sorkar sangdong nungji yamai shia lir, "Finland teacher training program indang file ji LG-i agizüktsü aser India Tir nem agütsü aser anogo 15 tsüngda

Arishi küm 80 Ajungba Tepela Lemsateper Tsürabur Meyitola Changtongya Town



Tasoba Anogo : 06/03/1943

Tsüngremer temeim aser tawabangba kübok küm 80 abensa-a anir arunung Teyanglur tenüng asanger. Ano maneni onok akümdong asütsü asoshi Tsüngremi na arishi anogo talangka moajangma ta sarasademtsür.

HAPPY BIRTHDAY

Temeim Chirnur, Semchirtem aser Anükapang.

PM Modi-i March 12 nü Karnataka semdangtsü

Bengaluru, March 05 (Agencies): March 12 nü Ato kilonser, Narendra Modi-i Karnataka semdangtsü aser iba mapang nungji pai Bengaluru-Mysuru Expressway aser Indian Institute of Technology (IIT) campus (Dharwad) semzüksütsü.

Taküm Karnataka nung assembly election agitsü lia Modi-i iba state ponguben semdanga terenlok project aika tenzüksüogo.

Union Minister for Mine, Coal & Parliamentary Affairs, Pralhad Joshi-i, Modi-i March 12 nü state nung tongti project ana- Bengaluru-Mysuru Highway aser Dharwad IIT semzüksütsü, ta metetdaksü. "Ato kilonser Modi-i Mandya nung expressway semzüksüba sülen Dharwad-i aotsü aser IIT semzüksütsü," ta pai metetdaksü.

"Ato kilonseri state semdangrtsü aliba agi Congress lenirtem tsübur. 2018 küm Congress-i tamakok angu.

Narendra Modi Ato kilonser makümdang 2013 küm Siddaramaiah-i election nung takok angu. Siddaramaiah-i Ato kilonser Modi anema tashishitsü o jembiba sülen 2018 küm nungbo pai tamakok chidangogo," ta Prahlad-i metetdaksü.

Ato kilonser Modi, Union Home Minister Amit Shah aser Union Defence Minister Rajnath Singh nunger densema Central lenirtem aikati Karnataka semdangba ya Congress-i ashishir. Amongnü Congress lenir, Siddaramaiah-i, tangsa state nung model code of conduct (MCC) benoktsüla, ta takhangba agütsüba den külemi Election Commission dang election agitsü anogo sangdongang, ta mepishiogo.

"Onoki iba dak sendakba nung EC nem temepishiba shidi ka agütsütsü. Ochimashi aser ozüng alema inyakba nokdangtsü atema tangsa Model Code of Conduct benoktsüla," ta pai ashi.

telangzüba angutsü atema 25/10/2022 nung LG office nem agütsü. Ajisüaka Transaction of Business Rules of GNCTD alema LG-i 10/11/22 anogo nung Delhi Chief Secretary nem file ji meyipa agütsü aser tashishiba onük asem agüja liasü. Tesayurtem training achaayangba mongin tentet SCERT Delhi-i item onükji jangjashitsüba sülen tanaben file ji 14/12/2022 nü LG nem agütsü."

"Iba sülen LG-i ano onük ana nung telangzüba meshia 9/1/2023 anogo nung CM nem meyipa agütsü. Taoba mapang Deputy CM Manish Sisodia-i CM ajanga 20/1/2023 anogo nung LG nem telangzüba tejangja agüja liasü," ta sangdong nung shia lir.

"LG nem file mezüng agütsüba sülen tang ita pezü jungogo. LG-i file agizükogo saka tarutsü nungbo

international training programs atema tesayurtem telok ka dang yoktsü aser training agir arutem jagi tanünga tesayurtem nem training agütsütsü benok," ta sangdong nung shia lir.

"Tia makaji, LG-i menotsüba ajanga training program ajak thinenogo. Sorkar school nung tesayurtem mezüngbuba batch ji yaküm December nung Finland-i aotsü liasü saka iba mapang nungji LG-i aiben ashishiba ajanga parnok moutet. Tanabuba batch ji March 2023 nung aotsü liasü saka file ji LG indang office nung ita ka dak tali ayu, ibaji ajanga onoki thinentüsü aküm," ta kasa sangdong ajanga metetdaksü.

"LG ya Delhi terenlok atema tenokdangtsü ka kümogo. Pa nükjidongji sorkar mapa tajung ajak nokdangtsü atema lir," ta kasa sangdong ajanga metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 06, 2022

Nübortemi kechi aginür ?

Asen lima aser asenok constituency nung junga agiang tagi, election sentong temogo, anungji election nung asenoki shilem agiba yari asenok tajangzük aser temoatsü angutsü imlaa atadi. Atangji, nübortem rongnunga pei pei nungdak yari taginüba alitsü aser election nung adoker yimsüsürüa pei pei tangatetba aser tejangraba yari nübortem asoshi tajung inyaksünüba tebilemba alitsü, anungji nübortem nungdak aser yimsüsür tangatetba na ajurutepa mapa aküm nung dang asen lima renloktsü. Tang tashi nung, Nagaland nung election 13 ben tashi agia government akümyonga Nagaland rongsenren nung tesensakba, shisaliok bushiba jenjang teküpbokba, government lenmang aser kiojen tamajungba aser yimten tebilemstü tuluba küma aoba ya election ochishia junga magitetba kisung agi masü saka nübortemia aser election nung toktepertemia pei nungdak aser pei nükjidadong mejangjaba agi asenok timtem aser shisabolu tuluba küma aoer ta repringtetter. Atangji, ajakbo masüsüa akok saka election nung toktepertem teimbakati election nung takok ngur MLA kümetra, pei lima aser pei nübortem libaliro jenjang tajungba kümdakja yaritsü tebilemba nung masü saka sen akaba agi tokteper, anungji madokyonga kecha masü saka adokra ano pei asoshi sen aatsü dang meranger. Iba jagi nübortemi shimtetba yimsüsürtemi nübortem kadaktsüsü aser anisüngzüka lidaktsüsü bilema meinyaki pei akatsü asoshi rongsen bendenba mapangtem asenoki ajangshia aruogo. Atangji, nübortem asoshi yimten tashi bener tajung inyaksüsü tangatetba nung takartem election-i aitsüla. Iba jagi government-i nübortem asoshi lemzükba senotsü chitsüsü melen, pei akaba rongsen dena enoksemer nübortem yaritettsü. Tanü, shitakbabo, Nagaland asoshi item lenirtemji nungdaker. Ajisüaka, ano takarsa mesüaka peisasa pei taküm aser kibong nokdaktetba nisung shibai nübortem tenzüksü aser yaritsü jangrar aser shiba dak asen lima renlokdaktsüsü shisatsü aser temetetba lir, iba nisungjisa tanü Nagaland nung yimsüsür asüsü atema tenungdakba. Tanü asenok Nagaland tejakleni moutetbaji, ashiko asenok dak asen lima meimba shisatsü aser asen lima tajungba küma renlokdaktsüsü tejangrababo alitsüa akok, saka asenok dak asen lima renlokdaktsüsüa tashitemetet aser 'idea' maliba ajanga asenok khi yimsüsüba aser ketdangsuba menden nung alidang teti asoshi asen tsügnep tajung alitsüa kecha meinyakteter asüsüa akok. Iba jagi nübortem tejakleni anir moutet timtemdaktsür. Ano külen, nübortemia pei taküm, kibong aser chirnurtem asoshi shitakba nungdakbabo memetet ser election nung sen ishikayong pei vote yoker tananü nungibo timtema alir. Itemji ano taruba election atatsüba dang. Iba amaji asenok taküm arishi tatsüka ya atemtsü na ? Asenok nübortemi asen alidak alu junga ayimtsü aser mapa tapu balala apiteta inyaksü atema gari lenmang, electricity aser teyari tapu balala meshia inyadaktüsü melen yim süngküm (village gate), yimkong senden ki (Community hall) aser tenla ki yanglutsü asoshi dang bilema pei MLA ajanga government sen 'adjust' süa agibaji terenlok mapa tuluka inyak amato bilemer. Ano, asenoki nungdak tuluka amai bilema inyakbaji asenok arogo aser lokti tentet jubilee aser senden nung asen MLA tongti tesemdang asüsü jaoker senotsü tenla tulu agütsüdaktsüba ya asüsü. Itemjiang asenok kolok nung lir. Ajisüaka, itemji rongsen molutetba aser züsentetba "productive" mapatem masü. Iba jagi asenok yim süngkümbo akhüm taket aser yimkong senden kia tajung, ano tenla kisa tajungba saka kidang kinunger shinga mapa inyaksü maka, anungji chiyongtsüa maka, asenok 'relief jang' dak metaloker 'relief camp' nung alir amai alir. Election nung vote ayokba sen meyerijang ishika semer relief jang chiyonga koda asen kibong aser asen lima yangertsü ? Joko, asenok tokolok aser shisatsü ya asen yim süngküm, asen yimer lokti adenshidak yimkong ki aser tenla ki yanglua jubilee amongtsüba nungdak dang nungi talangka alema oagi bilema inyaksü mapang tongogo. Itemji shisadanga nübortem aser MLA na tsungda 'Economic Development Ideas' lemsatapa pei lima aser pei taküm aser kibong nüchiso asoshi inyaksüla.

OLEMSABANG

KODAASÜTSÜ SUNDAY SCHOOL SHIBANGER

- P. Renthly Jamir

Tsüngremi yangluba süngdonglidong shiruru ozüsangno ango ajak moaja tejang rena tangang aser jenti kümang ta moatsü. Ano meimchir dang soyapokya jenti renang aser alima süngdakjang ta ashi Lipok 1:22-28. Tsüngremi kodanga ishika kümang, tanur ka ana sor numenden shibanga yuang (Birth control) ta ashiba kecha mangur. Noa dang Abraham aser Yakob nunger dang Anüng Petinu ama Molu lisem ama rendaktsüsü nangzük. Süra kechiba numenden nung tanur tepseta endoker. Tsüngremi tebursang aser tetsüla yanglubaji jenti soyapokyatsü yanglu. Hindu tetsürtembo tebuba anema yujang ta lumia anogo ka Mahashivratri amunger ano kiyi maortema tebur ka moajang ta kulemi amunger. Tsüngremi amia sangrema alitsü meyanglu. Abrahami Sarala sür tetsür tasen Ketura agir tanur aika sotsüba Lai nung angur.

Tanü India nung birth control, birth control ta nübu temeki küma aoba tongtibangsa Nagaland nung tanur masor nisung agi anüngseta aliba kuli aika angur. Alima otsü nung Matalokdangba Kum ter yongsük census 2001 to 2011 nung Nagalima rangben nung nisung kati maso tasübabo 9436 (0.47%) 2001- 1988636, 2011 nung 1978502. Meyitoku noklang pezü semer trok agi ajem. Aser yimdak yimtsungtem nung melinür rural nübu 14% decreased aser urban towni aoba 69% increased. Yimtem tazüng akümer, Dimapur nütsüng renloker. Kechiyong asen Naga nunger urban area ta asübaji Dimapur dang lir. Mokochung, Tuli, Mangkolemba, Changtongya towntema rural area den kasa, Dimapurleni omaogo.

Tang alima nung nütsüng teimtibaji China Lima lir. Parnok kibongshia tanur ka one child policy tasür tanur ka dang asotsü kari tali Sora senchi agütsür, takartemi tanur ana asor. Saka one child policy jagi tebur million 70 sangremtsüsa aküm kechiyong tanur ka atemabo ajaki tebur dang asor, tetsürbo tepok nung alidang raksa endoker anungji ka asoba nungi ana tashi asotsü ozüng melenshi. Saka ano tanur ana asoba agibo nübu agi mepirir.

Linük nung nübu agi meperi factory aser industries ajak nung nübu agi meperi teinyaker mali mapa majeter anungji tanur tali asembosa asotsüla tasür China relaxes two limit child policy allowing couples to have upto three children 31-05-2021 ozüng yangluogo. Pi takar temeteter lima South Korea nunga tanur ajema asoba nokdangtsü weekly working hours government aser company ajak nung Ghonda 68 inyaka aliba 52 kümja taliba jenjang tajungba akumtsü employment tali adoktsu, quality life atema melen ta 01-03-2018 sangtong.

Tsüngremibo alijak süngdakjangta ashir saka America aser England limatem nung nübu onsara ajema asor. When the America birth rate has reached its lowest level for the year the number of births in Great Britain is also showing decline. Akidang Muslim nungertemi alima nütsüng tali rendakja tetsür asem pezü agitep saka parnoka tetsür tali magitsü ozung yangluteper. Bangla Tax for Extra Wives ka dak tali agira polygamy Extra Tax sen 10,000 Taka £78 agitsü ta city Mayor Rahmani sangtong. Anungji aji agia alima nütsüng tali renlokba ajemer. Meimchiri Tsüngremi soyapokya jenti renang ta ashiba anema birth control sentong jenti yanglua zuinbabo nokdangteter saka tasürbo kata menokdangteti alima nung akümlir jentisa jenti anojungi asü yimi aor. Asotsü nokdangteter asüba sota meyuteter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Taoba mapang ketdangsertemi Khristanem amakba aitsütsü akhanger



February 19, 2023 nung New Delhi nung Khristanem aser meimchir temden atema inyakertemi Khristanem anema inyakba anentsü takhangba agütsüba rally agidang tangokba noksa nung ngur.

March 05, 2023: Taoba mapang sorkar ketdangser 93-i tentetba telok Constitutional Conduct Group-i Ato kilonser, Narendra Modi dang India nung tesempa bulua akümba aser Khristanem anema inyakba anema ola adoka aijang, ta takhangba agütsü.

Taoba mapang ketdangsertemi, yimsü alia amangertem ajanga Khristanembo pei linük nung ainertem ama bilemetsüsa akümer, ta metetdaksü.

Honibarnü taoba mapang ketdangsertemi, "Khrisan nütsüngji India nung nung shilem 2.3 shi dang lir, aser nütsüng shilem ya 1951 küm census agiba mapang nungi tang tashi kasa dang. Ajisüaka karibo iba nütsüng (Khristanem) ya nütsüng shilem 80 aliba Hindu nung atema amokmeren ama bilemer," ta metetdaksü.

Tesüiba küm ishika tsüngda Hindutva telok balalai Khristanem kangshia yimsü

meyipdaksür, ta tai tonglokja Tenla kitem aser Christian prayer halls amaker, ta parnoki metetdaksü.

March 2, 2023 nüa Delhi nung World Book Fair nung yimsü alia amanger telok kati Khristan stall ka raksatsü. Iba stall ji Khristan melungtet telok, Gideon International-i lapoka liasü.

February 28, 2023 nüa Hindutva telok Bajrang Dal-i ken o benokba nung ajemdaker Ghaziabad nung pastor ka aser pa kinüngtsü na apu.

Iba jakdang Madhya Pradesh state kübok Narmadapuram aser Chhattisgarh kübok Narayanpurwere nunga Tenla kitem raksaja liasü.

Taoba mapang ketdangsertemi, "Khristanem tangartem yimsü meyipdaksür süra kechiba tesüiba küm aika linük nung Khristan nütsüng shilem mainer?" ta asüngdang.

Iba shidi nungji sign süa alirtem rongnung taoba

mapang Election Commissioner SY Quraishi, taoba mapang Chief Information Commissioner Wajahat Habibullah, taoba mapang IAS officers Harsh Mander, Julio Ribeiro aser Najeeb Jung nung densema lir.

Parnokisa, linük nung Khristanem talisa shisaliok, healthcare aser social reforms nung shilem tajung agir, ta metetdaksü.

"Wara mapang nung Khristanem ketdangsuba hospital meyirjang ka dak tema nung shirangertem yariogo. Shisaliok süaka healthcare süaka Khristan rejutem kati danga item rejutem nung Khristanem dang tajanzük agütsütsü ta mashir," ta parnoki metetdaksü.

"BJP nungi tongti lenirtem, Union sorkar aser state shia nung sorkartemi ola adokra item tatalokba ajak tangasa anentsü," ta parnoki metetdaksü.

World Day of Prayer nung Taiwan atema sarasademtsüogo

Metsüremi/March 05, 2023: Hokolbarnü (March 3, 2023) World Day of Prayer nung alima tesem balala nung tetsür million aikati sarasadem nung shilem agiogo; talisa parnoki Taiwan atema sarasademtsüogo.

Küm shia World Day of Prayer anogomong nung linük balala atema temeja sarasadem agitsür; yamaji taküm Taiwan atema sarasademtsüogo aser taküm küm atema omenji Efesa kaket nung aliba lai nung ajemdaker "Ni nü tamang angashiogo" liasü.

Iba anogomong tekülem sentong nungsa tensa balala ajanga takoksa anguba tetsürtem nem ajungmesoba aser tasü itdaksüba shidi agütsü.

Australian committee for World Day of Prayer-i

sangdong ka ajanga, iba anogomong ajanga alima tzü-mopung kümzüksü asenok nenshia ajungshir aser mapa inyakba tesemtem aser kidang tetsür-tebur kasa züngshitsü atema awareness agütsütsü asenok nem nenshia metetdaksür, ta metetdaksü.

"Taiwan nung Khristan aianutsürtemi asetkong nung ali nungi adokba rongsen balala moatsüba atema Tsüngrem nem tenüngsang agütsür; parnoki asen tamang sarasadem akhanger," ta kasa sangdong ajanga metetdaksü.

World Day of Prayer anogomong nung linük 170 dak temai shilem agia World Day of Prayer International-i lemsatepba sarasadem onüktem nung ajemdaker sarasademogo.

Parnok indang website ajanga, "Anü adokba mapang

nungi anülü tashi alima tesem balala nung asen sarasadem ajanga anü lenmang sülen anidaksü," ta metetdaksü.

World Prayer Day ya mezüng 1920 küm January 9 nü Canada nung ayongzüka agi. Australia nungbo küm tenet lir sülen ang 1927 küm Queensland aser New South Wales nung agia liasü.

World War 1 sülen nungi alima tesem balala nung tetsürtem atema sarasademtsüji kanga tongtibang aküm aser tang tashi nung iba anogomong nung Australia atema küm ana tashi alakteta sarasademtsüogo.

Tangbo Australia nung 'World Day of Prayer' ya tetsürtem temeja aliba organising committee-i ayongzüker saka iba sentong nung tetsür-tebur ajaki shilem agitsü akok.

ANOGO ABEN TSÜNGREM DEN

Ilungang Tsüngrem (T.Ken 80:1-5)

Tsüngremi ne taküm nung meilungi inyaka ali asü? Dawid den Pa yamaji liasü. Iba ken ya Sauli Dawid timtemdaksü dang zülu. Aji asünung pai ayimten, "Kibuba, kechiba nai kecha meinyaker. Na kanga meilungi lir."

Tsüngremi meimba indang nai shisadanga lir ma? Pai kodanga mariteper, saka kodang Pai mapa inyaktsü tenzüker, repranga liang. Dawidi mepishi, "Ilungang, ilungang" (t.1). Pai pa temepishiba tekong 5 nung lepshia ashi: "Saka ni sensaker aser anünga lir; kü dangi kara arung, O Tsüngrem: Na kü teyari aser kü kümzükba; O Kibuba menua teli."

Tsüngrem mapa inyaker masü, menur ama süra, nai kechi inyaktsü? Pa bushiang aser Pa dang ataa liang aser Pa meimang. Tekong 4 kanga tobur junga shia lir: "Shiri na bushir parnok ajaki peladakjang aser ne dak temulung süngzükdakjang; aser shiri ne tekümzük meimer parnoki maneni Tsüngrem tushidakjang" (T.Ken 69:30).

Yangi asenok asoshi lesson tajung ka lir. Kodang asenok bilemba ama Tsüngremi mapa meinyaklir, kodang asenok mapang metsükteplir, asenoki kechi inyaktsüla? Pa dang pelaang, Pa meimang aser Pa tushiang. Mapang atema Pa tebilemetsü südakjang. Tsüngremi teti mapa ajak tajung asoshi inyaker (Rom 8:28). Saka Pa takok jungkai adoktsütsü asoshi mapang shidakji ataa alir. Pai anü tetsüji reprangdakjang.

Tsüngremi menubaji ne jakla yangluba yim nung shilem ka lir. Tanabuba mapangji Tsüngremi na manidaksür, Pai kodanga na asoshi mapa inyakba manener ta bilemteta tasü itang, aser Pai kodang koda na yaritsü metetta lir. Pa mapang nem aser Pai anebaluba nem bendanga agüjang.

Nigeria Tir tasenba kübok Khristanem maneni timtemtsüa akok

March 05, 2023: Tawa ta aikati bilemer. Nigeria nung ruling party Tir election jakdang tongti candidate, Bola Tinubu-i Tir putir, Ben Kwashi-i, election nung takok anguba "Khristanem iba linük toktsür ajanga linük nung Khristanem ajentsüa akok. Khristanem tarutsü tia atema shisabulua alima tesem balalai jena aotsü. Parnoki reshikangshi ata-a bilemer. mekazütsü," ta ashi.

Arrshi küm 70, Bola Tinubu-i vote shilem 37 angu, ta Tir tasenba Bola Tinubu-i ketdangsertemi metetdaksü, linük security atema nendaka ajisüaka statistics ajangabo inyaktsü aser Khristanem linük nung vote agütsür shilem kümzüksü atema 27 dang liasü, ta sarasademjang, ta ICC-i metetdaksüogo. ayongzükogo.

Nigeria nung Tir election Alima nung Khristanem atongtsü mapang nung Khristan mejungi reshikangshiba melungtet telok Release linüktem rongnung Nigeria International (RI) indang densema lir. Yaküm Nigeria partners-i, tang Nigeria nung nung Khristan 5,623 tashi tebilemetsü onük tulutibaji linük tepsetogo.

Open Doors-i U.S. State Department dang Nigeria ya ano maneni country of particular concern (CPC) linüktem rongnung züngokang, ta mepishiogo.

Tang agi küm anabuba CPC linüktem rongnung Nigeria security atema meinyakra maliba ya agizüktetsü makok, Nigeria nung Khristan aikati ta shia Nigeria ya CPC nung linük toktsür ajentsüsa akümtsü, züngoktsü mepishiogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Paok

(v) teka agi enok (put in)

* Kütsüi aon nung metsü shitak paok.

Papok

(v) lenmang patet, lapok (open out)

* Arem min nung tiri lenmang papoka telok anir ao.

OLONG PAITEP # 6447

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6446 TELANGZÜBA

TIPLÉN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.



ALOKBAER KIBONG ELECTION SEN AYUTSÜ SHISABULUR

Alokba : Hai kinungtsü, candidate dang vote alitsü sen five lakh meshiba tu ni shinga nema magütsü, aleper ayuji sentu aika anungogo, ano asen atemabo 20 lakhs meshiba tobo yamato sur yua lir, ya koda asütsü.

Kinungtsü : Aya mah! Shisabulu tulu, tangbo Arogoi ah election memerükba rongsen bener taru asür, kong ayutsü ah nah..... Ki yangludi asüyonga temolung animesüngzük taküm beyong koda alitsü, asen chinur aser semchisemnur tengah olangtsü makatsü. Ki oset aser süoshi aliyonga tangari metettsü, koda masü kümogo. Joko obay maliji, asen kiyonger leper alitsü jembidar yangji tengah inoksemdakjang .

Alokba : Aya shidak ah. Kinungtsü, election nung sen meshia agiba ya kangasa majung ah, anungji tang nungibo aruyaa aliba election nung jibo sen yong masü ochishia asen temeten vote agütsütsü Tsüngrem dang Sarasadema atadi, Aser election nung menaba tai nangzüksü anogo asemnü tanga prayer centre ka bushia odi, aji masü nungbo asen kibong ya majungtsü.

Kinungtsü : Shidak ah, nasa tabensaba!

- Lilir : WhatsApp



TEPELABA SANGDONG

14 buba Nagaland Legislative Assembly Election mapang, kicha aser lokti balala kwikati ni aser ozü kibong dak malangba nebu, rongsen, aser temeim tenla jenti agi yariogo, nenok ajak dang kangasa pelaba tenungsang iba sangdong ajanga metetdaksür.

Yongji, pei tangatetba palala nung noktaka election nung shilem agir liaka, kü takok tepela benjong ya asenok Jangpetkongsanger ajak meyong lir. Kechiaser, election agiba mapang, asen constituency ajungkettsü atema ni kechisa nangzükogo, ni item tenangzükbatem nungi mainshitsü. Saka, asenok arok nükla aser alizüng tongtettsü asoshi ni nenok teyari maneni nungdaker.

“Külemi bo Inyaktettsü” (Together We Can) ta koba kü election omen liasü, iba kasa omen lenisüba nung, nenok tenzükba maongka kumzük matem pang tashi, yaritepa alitsü atema ni mepeshir. Külemi asenok-i inyaktet, ano külemisa asenok-i inyaktettsü, aser iba takok tepela bejong maneni lidaktsüti!

**TEMJENMENBA
NDPP CANDIDATE
29 JANGPETKONG A/C**



Meghalaya BJP-i cabinet menden ana meshir



Meghalaya BJP state President, Ernest Mawrie

Shillong, March 5, 2023 ashi.

(Agencies): Conrad Sangma-i aniba sorkar nung Meghalaya BJP-i cabinet menden ana meshir.

"March 7 nü tezüngzüktep agidang BJP MLA ana- AL Hek aser Sanbor Shullai

naprong Meghalaya cabinet nung adentsüla" ta BJP state president, Ernest Mawrie-i

"Meghalaya BJP-i CM-designate Conrad Sangma dang tenaprong dendaktsütsü ateam mepishir. MLA anaprong tejen aser aika ajangshia arurtem lir" ta pai ashi.

AL Hek-i taoba sorkar nung Health and Family Welfare Minister inyakogo aser Sanbor Shullai ya tawa tu ang Cabinet

Minister ama tezüngzüktep agia liasü, ta Mawrie-isa ashi.

"AL Hek ya MLA trokbenbuba lir aser Sanbor Shullai ya-a MLA pezübenbuba inyaker. Shullai ya kümsük pungu atongtepa MDC liasü. Ozü party MLA anaprong ya tejenpurtem lir" ta Mawrie-isa metetdaksü.

Ajisüaka BJP central leadership ajanga dang tatembang telemtetba agitsü,ta paisa shisem.

NPP-BJP-HSPDP den Independent MLA 2 dener Meghalaya sorkar tasen akümtsü sentong lir.

NPP-i menden 26 nung takok angu aser BJP o HSPDP ajanga menden anana nung takok ngua liasü.

BJP-i Meghalaya sorkar nung shilem tuluba aginüa jembia arur. Taoba Conrad Sangma-i aniba sorkar cabinet nung BJP MLA ka dang liasü.

Manipur nung nisung 500 miim chisemer timtemer

Imphal, March 5, 2023

(Agencies): Manipur kübok Kangpokpi district nung nisung 500 shi chiyungtsü nung miim chisemer mozü kidang anepalur.

Honibar nikongdang 6:30 ako meta Chalwa Kuki yimtsü nung nisung 1000 shi ka benjung chiyungtepa liasü, ta kettangsurtemi ashi.

Iba yimtsü nung nütsü nung yongsük 1700 shi ka lir aser yasüng 9:00 ako meta ka nungi nisung aika dak temang nung timtem adok.

Parnok kar saksü, kar tepok anghoh, teku ashi aser tepok ao ta kettangsurtemisa ashi. Iba atema lennirtemi anameta aliba Assam Rifles battalion den

osang agitep aser AR indang medical team ka oa yaritep.

AR doctor temi nisung 70 tashi nem injections aser life-saving drugs agüja liasü.

Iba yimtsü nung medical camps ana lapoker shirangertem anepalur aser chiyungtsü nung miim chisembaji bushiteper.

South Korea-US drills anendaktsütsü atema UN-i akhangtsüla: N.Korea

Pyongyang, Metsüremi/March 5 (Agencies): North Korea-i United Nations dang United States aser South Korea nati joint military drills ayongzüka agiba anendaktsütsü atema takhangba ka agütsütsüla ta shiogo.

Deobarnü state media nung sangdong ka ajanga Vice Foreign Minister Kim Son Gyong-i ashiba agi, drills balala ayongzüka agiba aser tembar linük anayagi tali nongshiba ajanga tensa kanga mejungi kümdaktsüogo.

Paisa, UN aser alima kintemi US aser South Korea nati amokmeren o jembiba aser joint military exercise balala ayongzüka agiba anendaktsütsü atema ajang ajanga mepeshitsüla ta ashi.

Seoul aser Washington nungi ketdangsürtemi Hokolbarnü sangdong ka ajanga March 13 nungi 23 tashi anogo 10 dak tema large-scale military

exercise ayongzüka agitsü, kong amphibious landings densema lir ta sangdongba sülen North Korea-i iba telangzüba agüja liasü.

US aser South Korea nati iba inyakyim ya parnok kümzüka ayutsü atema lir aser North Korea indang ballistic missile aser nuclear weapons programme tem, koba UN Security Council bangzüng agi tenokdangba agütsür lir, item ajanga parnok amokmerenba atema telangzüba agütsütsü asoshi kanga tongtibang lir ta ashi, ta ashi.

Ajisüaka Pyongyang-i item sentongtem ayongzüka agiba ya parnok amaktsü asoshi terenemshiba ka ama reprangteter.

Honibarnü NK-i, international arms control systems chirepa aoba ya Washington dak tai tongloksüogo aser ashiba agi, parnok indang nuclear hadirtem

ajanga dang parnok meketa aliba tesem nung tashi liromedema kümdaktsüetetsü.

Seoul aser Washington nati Hokolbarnü US indang long-range bomber aser South Korean fighter aircraft tem anisemer anüng nung drill ka ayongzüka agiogo, koba tawa linük ana longjemer training balala agiyonga aruba nung tesüsabuba lir.

Linük ana senteper iba amala inyakyim benoka inyakba ajanga iba tesem nung tensa kanga mejungi aliba nungi mazüokteti kümdaktsütsü, ta Kim-i tekümdangtsü metetdaktsüogo.

Iba inyakyim dak sendakba nung UN-i kecha ola madokba ya tesasatsüka, ta paisa shisem.

Taoba ita Kim-i sangdong ka ajanga, North Korea-i missile tendangba dak sendakba nung UN Secretary-General Antonio Guterres-i lokti ajak den kasa benshitsuiba yimya mebenshi, ta ashi.

Taoba Pakistan PM Khan aputsü police temi par ki tonga lir

Lahore, Metsüremi/March 05 (Agencies): Sempet aliba aser ayokba ken o dak sendakba nung taoba Pakistan ato kilonser Imran Khan aputsü police tem pa aliba tesem tonga aruogo.

Deobarnü police temi Twitter nung osang balala sangdongba nung, police tem Lahore nung Khan'er ki tonga aruaka pa jenshia senzür aser police superintendent ka pa taodaki ai saka arishi küm 70 tain Khan yangji meliasü.

Khan ato kilonser inyakba

mapang ozüng alema osettsüset aliba aser bendanger tongtipang nisungtemi sempet agütsübatem ayokba dak sendakba nung pa okadaki maruba mechi Mongulbarnü Islamabad nung aliba sessions court jati pa anema non-bailable arrest warrant agütsü. Khan-i item taitsuba magizüker.

Khan ya taoba küm April ita parliament nung vote of confidence agütsütepba nung tamakok ajuruba sülen ato

kilonser menden nungi atsüngdok aser kiralongra mapa inyakba nungi ochimashi mapa inyakba tashi pa anema ken o ter dak tema benoka lir.

Deobarnü police tem linük yimtiba, Islamabad nungi linük anüdoklen Lahore yimti nung aliba Khan'er Zaman Park ki tezülen arua aliba nguogo.

Khan aputsü tuyuba anema pa bukumer aser par Pakistan Tehreek-e-Insaaf (PTI) party züngsemtem noklang aika adenshia liasü.

(Maneni tapak 8 nung...)

Syria menoknok lendong ajurua alirtem memonui yaritsüla: Qatar Emir

Doha, Metsüremi/March 05 (Agencies): Syria nung taoba ita menoknok anokba lendong ajurua alir nem teyari agütsütsü menuba mangateter aser yimtenren mechi humanitarian aid pei süniüsü süa amshiba ya tai, ta Qatar indang emir-i ashi.

2011 nungi Syria nung tenzüka aliba civil war nung sorkar anemer yariba linüktem rongnung Qatar ya ka lir aser linük kari Damascus den tesendaktep yanglutsü merangba anema parnoki taoba mapanga jembia liasü.

UN Least Developed Countries mungdang Qatar yimtiba Doha nung Deobarnü tenzüka nung jembidang Sheikh Tamim bin Hamad al-Thani-i Syria nung menongnangi yaritsü aser Turkey nunga iba menoknok agi akoksatsür aliba nungi shia arutsü merangba nung yaritepsü shia liasü.

"Asenok yangi senden amendang Turkey aser Syria nung asen adianutem tang tashi menoknok tesashi agi kongshiba ajanga tim atemer," ta Sheikh Tamim-i ashi.

"Adianu Syria nübur nem menongnangi teyari agütsütsü kanga nüngdak ta ni ajungshir. Yimtenren atema meimchir asoshi takoksa tulu ajura aliba amshitsü ya magizükteter. International human solidarity dak alaka tanü aser asüng atema alima tasen aser tajung yangertsü lenmang kecha maka."

Iba menoknok ajanga Turkey nung nisung 45,000 dak tema asü aser Syria nunga

nisung 6,000 jungnüa asü kong Tir Bashar al-Assad sorkar den rarar aliba northwest region nung tamajungtiba kongshi.

Küm aika civil war ajanga raksatsür aliba linük, Syria nung teyari osettem tekeraba nung agütsütsü asoshi United Nations-i telok ajak dang melatsü ayongzüka lir.

Damascus sorkari tenokdangba agütsür aser teyari agütsüba nunga yimtenren teka aiter, ta ashir. Ano Syria nung sorkar kübok aliba tesemtem nungi teyari bener arutsübatem sorkar anemer temi nokdanga tali tepenjaba kümdaktsür ta ashir.

Turkey kisüng nunga menoknok agi kongshia aliba tesem nungi nisung 530,000 jungnüa anizüker ogo aser tang tashinung nisung aliba ki 173,000 chirepogo mesüra kanga sashia raksar lir aser nisung million 1.9 dak tema khen asoshi tejenokdak yanglua aliba mesüra hotel aser public facilities nung jenoka lir ta Turkey sorkari ashir.

Syria nunga iba menoknok yangi nisung million 8.8 dak kongshi ta UN-i asadangteta lir.

Taoba ita menoknok anokba sülen Syria northwest tsütsü saksüpokshi agi nisung 22 asüba osang lir.

"Menoknok sülen ki o jen, tzü aser kilentzü aoba lenmangtem raksaba ajanga iba tashidak poktettsü lenmang tali sadema lapoktsür," ta Syria Civil Defence (White Helmets) ajanga Twitter nung ashi.

Cambodia opposition lenir ka küm 27 atema soita yuogo



Phnom Penh, Metsüremi/March 5 (Agencies): Cambodia nung opposition lenirtem rongnung tongtiba küm 27 kidang nungi mainshi soita ayutsü obendang agütsüogo. Pai linük ashioktsütsü merangba atema iba obendang agütsüogo.

Kem Sokha ya tang loksar aliba Cambodian National Rescue Party lenir liasü aser pa election nung metokteptetsü aser vote dena magütsüetetsü.

Ato Kilonser Hun Sen-i aniba sorkar atsüngtoktsü

atema bendanger tashitem den longjemer inyakba atema pa aitsüogo.

Hun Sen ya alima nung autocrats tem rongnung linük talangtiba tenzüka lenir ka lir, shibai 1985 küm nungi linük yimsüsüa arudar.

Cambodia nung taküm July election agitsü renema lir. Taküm election nunga pa tokteptsü imlar, ajisüaka pai tashi ya par jabaso tambusang Hun Manet nem melenzüksütsü sentong yangludat ta aikati bilemer.

Arishi küm 69 tain Kem Sokha ya 2017 küm mezüngbuba apu. 2013 küm pai video ka nung, US pro-democracy teloktem nungi pai teyari agizükogo ta ashiba dak ajemdaker pua liasü.

Pa aser pa okatsür napronglai iba taitsuba magizük aser ashiba agi, pa anema ken o benokba ya tamendakdak mali. Cambodia dangi US ambassador W Patrick Murphy-i Hokolbarnü ashiba agi, iba ken o ya ochi obendang anema lir.

Kem Sokha indang okatsür ketdangsürtemi dang pa Ang Udom-i ashiba agi, par legal team-i iba obendang agütsüba anema ken o benoktsü, ta Reuters news agency sangdong ka ajanga metetdaktsü.

Pa anema ken o benokba ya tamendakdak maka aser yimden yimsüsüba tsütsü tajangzük angutsü atema lir ta shia Human rights teloktem aser anüolen aliba sorkartemi aitsüogo.

"Kem Sokha anema ken o benokba ya tetenzük nungi yimden yimsüsüba dak sendaka lir ta angatetogo, koba Cambodia nung opposition lenirtem anintsü aser linük democratic inyakyim raksatsütsü atema Ato Kilonser Hun Sen-i tasa asaba ka lir," ta Human Rights Watch nung deputy Asia director Phil Robertson-i ashi.

"Kem Sokha tepuokdaki yokba ya pai aniba political party raksatsütsü atema dang masü saka July ita chichiba general election agitsü ta timla aliba samatsütsü asoshi lir," ta paisa ashi.

Iba telok yagi

ketdangsürtemi dang pa tepuokdaki yokba ya tangsa tang agintsü aser kecha terakdakba makai pai chioiktsü atema ayongzüko.

Iba obendang agütsüba ajanga nisung aikabo maoksatsü, kechiyong Cambodia nung court tem ya Hun Sen-i azüoka lir.

Taoba mapang human rights advocate Kem Sokha lenisüba nung Cambodian National Rescue Party inyaksangshia liasü. Taoba mapang election nung parnok kanga nüngtugu aküm aser Hun Sen aser pai aniba party dena atsüngtoktsüa jenjang ka nung liasü.

Par party ya 2018 küm election magi tsüngda tenokdangba agüja liasü. Iba party nungi lenirtem timba temzüng ozüng kübok aitsüogo mesüra linük toktsür aotsüsa kümatokogo.

Taoba ita Hun Sen-i linük nung independent media outlets ishika dang aliba nungi ka shibangtsüogo. Voice of Democracy yagi par jabaso anem otsü sangdong aser sorkar maitsü raksatsü ta shia iba media outlet shibangja liasü.



Acapulco, Mexico nung Mexican Open final nung United States nung Tommy Paul akokba sülen Australia nung asayar Alex de Minaur takok marok amer tangokba noksa nung angur.

Kylian Mbappe-i PSG nung otsü tasen ka yanglyuogo

Metsüremi/March 5, 2023

(Agencies): Honibarnü Nantes goal 4-2 agi akokba asaya nung goal idaktsüba sülen Kylian Mbappe ya Paris Saint-Germain nung goal timtiba idaktsüba asayar kümogo. Pai tang tashi nung goal 201 idaktsür lir.

Taoba hopta Marseille den asayaba mapang goal ka idakja Edinson Cavani-i goal 200 idakja otsü tasen yanglur aliba den Mbappe kasa aküm aser Parc des Princes nung asayaba mapang goal ka idakja pai Cavani ajatetogo.

Asaya nung minute 17 tsünga Lionel Messi-i PSG atema mezüngbuba goal idaktsü aser iba sülen Jaouen Hadjam-i own goal ka idakja liasü, ajisüaka Nantes puri goal ana idakja kasasa aküm.

Nantes pur atema Ludovic Blas-i mezüngbuba goal idaktsü aser iba sülen Ignatius Ganago-i tanabuba goal idakja liasü, ajisüaka Mbappe-i Danilo Pereira atema ball ka yangluja goal tasembuba idaktsüba sülen parnok goal ka agi tejakdang

aküm iba sülen mapang apuloktsür asayaba mapang Mbappe-i goal ka idakja otsü tasen yanglua.

2017 küm arishi küm 18 asüba mapang Monaco nungi arua adenba sülen Mbappe-i asaya 247 nung iba otsü tasen yangluogo.

Uruguay nung nungtu asayar Cavani-i asaya 298 nung 2020 küm iba otsü tasen yanglur liasü. Iba alizüng tasen tongtetba atema arishi küm 24 tain asayar nem club-i ground nung sempet agütsüba mapang trophy ka agüja liasü.

"Ni otsü tasen yanglutsü atema asayar aser ni France nung, linük yimtiba nung, ozü yimti nung otsü tasen yangluner ta shia aruogo aser ni aji inyakdar. Ni kanga pelar saka ano tinyaktsü aika lir," ta Mbappe-i ashi, shiba captain ama asaya tembanga liasü.

"Parisian ka iba ya ni atema kanga tongtibang lir. Otsü tasen yanglutsü atema goal idaktsüba mapang na captain armband semer alitsü ta kari shira ni mamangla," ta pai ashi.

Iba asaya akokba sülen PSG pur Ligue 1 nung tanabuba jenjang nung aliba team dang nungi point 11 agi timba kümogo.

Kasa mapang nung parnok Bodhbarnü Champions League last-16 tanabuba leg Bayern den asayatsü lir. Mezüngbuba leg ya Bayern-i goal 1-0 agi koker lir.

Iba asaya nung Morocco nung asayar Achraf Hakimi masayatet kechiyong pa yirur lir aser kasa mapang nung arishi küm 24 tain tetsür kati la dang Hakimi-i tashiyim benshi ta shia ken o ka benoker lir.

Iba asaya nung Neymar-a shilem magitet aser pa yirur aliba ajanga Bayern den asayatsü aliba asaya nunga masayatetsü. Maneni centre-back Presnel Kimpembe-a tetsüng yiruba sülen season tembanga masayatetsüsa kümogo.

Nantes den asayaba mapang captain Marquinhos aser stand-in right-back Nordi Mukiele naprongla yirur masayatetsüsa aküm.

Taoba Pakistan PM Khan aputsü police...

(Tapak 7 nungi...)

Police tem Lahore-i Khan aputsü ao aser pa nem warrang agütsüi aoba masü, ta Islamabad Police Inspector General Akbar Nasir Khan-i osangbener dang ashi.

Nasir-i ashiba agi, ozüng nung non-bailable arrest warrant indang mera mezüngbubahi tai tonglokja alir nemo sang agütsütsü aser idangjisa aputsü shia lir.

Deobarnü lokti sentong ka alidang interior minister Rana Sanaullah-i ashiba agi, police tem warrant agütsütsü aru aser iba sülen court nem osang agütsütsü.

Khan'er kimalen osangbener den jembidang PTI lenir aser

taoba mapang information minister inyaka alidang Fawad Chaudhry-ia police tem iba warrant maka kuma inyaktsü aru, ta ashi. "Imran Khan jenshia senzür ta police-i ashir. Ajisüaka police temi Khan aputsü merangba ya ozüng alema lir. Security junga malidak court kati parnoki Imran Khan anir oner aser yangji pa takum asoshi lendong lir," ta pai ashi.

PTI vice chairman Shah Mahmood Qureshi-ia Deobarnü meilongi party indang legal team den jembishinüba sülen mera agitsü, ta ashi.

"Onok political party ka lir aser onoki yimten yimsüsüba yimya nung langzütü. Onoki

tasa yanglutsü. Imran Khan takum lendong nung lir. Taoba mapanga pa dak timtem agüja lir aser ano pa dak timtem agütsütsü tsübor. Onoki pa kumzuka ayutsüla," ta Qureshi-i osangbener dang ashi.

"Imran Khan ya protective bail lir. Sorkari tensa adokdaksütsü meranger."

Taoba küm November ita Imran Khan ya sorkar anema longkak aita jajaba mapang Wazirabad yimti nung pa indang convoy maka pa dak tetsüng nung injang agi akha.

Iba mapang Khan busemer nisung ter dak tema yirua aser ka asü.

Daniil Medvedev-i Dubai Tennis Championships kokogo

Metsüremi/March 5, 2023

(Agencies): Dubai Tennis Championships final asaya Daniil Medvedev-i 6-2, 6-2 agi Andrey Rublev madak takok nguogo.

Third seed asayar yagi asaya minute 68 asayaba tepeyong kanga junga asaya aser iba asaya densema asaya 14buba atonga kokogo.

February ita Rotterdam aser Doha nung asayamung akokba sülen Medvedev ya Casper Ruud (July 2021) aser Felix Auger-Aliassime (October 2022) na sülen hopta asem nung asayamung asem akokba asayar asembuba kümogo.

"Iba asaya akokba ya jangrademtsüka lir kechiyong küm tenzükba mapang ni junga masayateti liasü. Tennis asaya nung asaya mekokra temulung melemteti akümer. Tangbo ni anisüngzükogo. Ni hopta asem jangaradema asayaogo aser taruba asayamungtem atema yongya atar," ta Medvedev-i ashi.

Arishi küm 27 tain asayar ya ATP Live Rankings nung No.6 buba nung lir aser pai Rublev ajatetogo shiba tenetbubai asepzüka aluogo. Rublev tena tsünga tang tashi asayayonga aruba mapang Medvedev-i ponguben aser Rublev-i anaben koka lir.

Tour-level title 18buba akokba sülen Medvedev taruba

asaya Indian Wells nung BNP Paribas Open nung tokteptsü.

Taoba mapang No. 1 asaya ya ATP Tour nung pa indang career nung asaya timtiba atonga koker aliba meneptsü atema asaya trok dang akoktsü nüngdaka lir. Pai 2020 küm November ita nungi 2021 küm January ita tashi nung asaya 20 khen danga tamakok mongoi atonga kokogo.

Iba asayamung nung Medvedev-i set ka nung dang tamakok angu aser Rublev den asayaba mapang pai pasasa dak kanga temulung lemteta asaya liasü. Arishi küm 27 tain asayar yagi mezüngbuba set nung unforced errors ana dang mena liasü.

Mezüngbuba set akokba sülen Medvedev-i maneni defence aser attack na kanga liromedema asayateta liasü. Baseline nung asayatepba mapang pai crosscourt forehand kanga junga amshia tanabuba set nung Rublev indang serve ana tashi break süa asaya akok.

2022 champion Rublev ya Djokovic aser Roger Federer na sülen Dubai nung iba ATP 500 asayamung ya atonga akoktsü atema nükjidong yur asaya liasü.

Medvedev-i tang tashi nung yimti 18 nung tour-level titles 18 kokogo. Pa ya Open Era nung iba alizüng ajanzükttetba mezüngbuba asayar lir.



Lal Bahadur stadium, Hyderabad nung tatembangbuba sentong agiba mapang nungtu tennis asayar Sania Mirza tangokba noksa nung angur. Sania-i iba ita tetenzüklen Dubai Tennis Championships asayaba mapang la professional tennis asaya nungi anentsü ta sangdonger liasü.

BILEMDANGANG

"Pela linüra na akaba agi temulung süa liang."